

沔陽州志卷十三

沔陽童承敘

秩官列傳

晉李陽成帝時守竟陵咸和三年從陶侃庾亮破蘇峻於石頭六年拔石虎將郭敬所陷新野及亮鎮武昌使毛寶樊峻戍邾城虎惡之以夔安爲大都督帥李農張貉等五萬人寇荆揚北鄙二萬騎攻邾城咸康五年九月貉陷邾城寶峻死之安進據胡亭寇江夏義陽將軍黃冲太守鄭進皆降於趙安進圖石城陽拒戰破之斬首五千餘級安乃退

鄧遐字應遠陳郡人平南將軍嶽之子也勇力絕人號

沔陽州志卷十三

一

爲名將哀帝隆和元年守竟陵燕呂護攻洛陽桓温遣遐及北中郎將庾希帥舟師三千人守之後守襄陽沔水中有蛟常爲人害遐拔劍入水蛟繞其足遐揮劍截蛟數段而出卒贈廬陵太守

羅崇海西公時守竟陵太和二年夏四月燕慕容塵寇竟陵崇擊破之又南陽督護趙弘趙億據宛城降燕崇與荊州刺史桓豁攻宛拔之留兵戍宛而還

桓石虔小字鎮惡譙國龍亢人征西大將軍開府豁之子也有才幹趨捷絕倫簡文帝時袁真以壽陽叛石虔以寧遠將軍南頓太守帥諸將攻之剋其南城又擊苻堅將王鑒於石橋獲馬五百匹除竟陵太守以父憂去



職尋而苻堅又寇淮南詔曰石虔文武器幹御戎有方  
古人絕哭金革弗避況在餘哀豈得辭事可授奮威將  
軍南平太守尋進冠軍將軍苻堅荊州刺史梁成襄陽  
太守閻震率眾入寇竟陵石虔與弟石民拒之賊阻激  
水屯管城石虔設計夜渡水既濟賊始覺力戰破之進  
剋管城擒震斬首七千級俘獲萬人馬數百匹牛羊千  
頭具裝鎧三百領成以單騎走保襄陽石虔復領河東  
太守進據樊城逐堅兗州刺史張崇納降二千家而還  
太元十三年卒追贈右將軍追論平閻震功進爵作塘  
侯

史敘曰石勒苻堅慕容暉并以黠胡雲擾中夏憑陵繹

河陽州志卷十三

二

騷闖我疆土陽遐崇虔先後奮臂挺鋒挫敵拒制驕虜  
時荆襄俱沒而竟陵孤危卒免陸沈石城激水之捷尤  
烈烈在耳目豈非矯矯虎臣耶

桓石秀石虔弟也幼有令名風韻秀徹博涉羣書尤喜  
老莊常獨處一室簡於應接時人方之庾純甚爲簡文  
帝所重謔爲荊州請爲鷹揚將軍竟陵太守非其好也  
孝武初代叔父沖爲寧遠將軍江州刺史領鎮蠻護軍  
西陽太守鎮潯陽

趙統孝武時守竟陵太元九年四月桓沖遣統攻襄陽  
荊州刺史桓石民復遣兵助之秦荊州刺史都貴犇魯  
陽



朱伺字仲文安陸人陶侃鎮荊州伺從侃討陳敏杜弢陳聲悉平之累遷廣威將軍領竟陵內史時王敦欲用從弟廙代侃爲荊州侃故將鄭攀馬儁等乞侃於敦敦不許攀等以侃始滅大賊人皆樂附又以廙忌戾難事謀兵拒之遂屯結涇口遣使告伺伺外許之而稱疾不赴攀等遂進拒廙旣而士眾疑阻復散還橫桑口欲入杜曾時朱軌趙誘李桓率眾將擊之攀等懼誅以司馬孫景造謀拒廙因斬之降軌等廙將西出遣長史劉浚留鎮揚口壘時杜曾請討第五猗於襄陽伺謂廙曰曾是猾賊外示西還以疑眾心欲誘引官軍使西然後兼道襲揚口耳宜大部分未可便西廙性矜厲自用兼以

伺老怯難信遂西行曾等果馳還廙乃遣伺歸裁至壘卽爲曾等所圍劉浚以壘北門危欲令伺守之或說浚云伺與鄭攀同者乃轉守南門賊知之攻其北門時鄭攀黨馬儁等亦來攻壘儁妻子先在壘內或請皮其面以示之伺曰殺其妻子未能解圍但益其怒耳乃止伺常所調弩忽噤不發伺甚惡之及賊攻陷北門伺被傷退及船初浚開諸船底以木掩之名爲船械伺旣入賊舉鋌摘伺伺逆接得鋌反以摘賊賊走上船屋大喚云賊帥在此伺從船底沈行五十步乃免遇醫療創小差杜曾遣說伺云馬儁等感卿恩妻子得活盡以卿家內外百口付儁儁已盡心收視卿可來也伺答曰賊無白



首者今吾年六十餘不能復與卿作賊吾死當歸南妻  
子付汝乃還甌山時王廙與李桓杜曾相持累戰甌山  
下軍士數驚喚云賊欲至伺驚創而卒因葬甌山  
史敘曰王敦左轉陶侃使從弟廙代之忌之也攀僞謀  
兵拒廙非惟不能留侃適以重敦之嫉而成侃之罪也  
伺之不赴是矣揚口之敗智足以料之而卒損所愛以  
死傳稱伺有勇而不學亦諒直之士哉

魯軌雍州刺史魯宗之之子也安帝義熙十一年守竟  
陵初劉裕忌司馬休之起兵擊之休之勒兵拒焉宗之  
自疑不爲裕所容與軌起兵應休之軌數擊殺裕將裕  
克江陵休之宗之俱北走軌留石城趙倫之沈子林復

破之軌與休之等犇秦秦滅降於魏

南宋劉粹字道沖沛郡蕭人累功封灑陽縣男以憂去  
職高祖討司馬休之起粹爲寧朔將軍竟陵太守統水  
軍入河後以佐命功改封建安縣侯卒贈安北將軍  
劉道濟粹弟也初爲車騎從事中郎元嘉三年討謝晦  
遣道濟與龍驤將軍沈攸之就粹自陸道向江陵粹以  
道濟行竟陵內史與攸之及南陽太守沈道興步騎至  
沙橋爲晦司馬周超所敗後終振武將軍益州刺史  
殷道鸞元嘉二年除竟陵內史時下詔討謝晦晦謀舉  
兵道鸞未之郡晦以爲諮議參軍以弟遯爲寇軍竟陵

內史



趙伯符字潤遠下邳僮人也少好弓馬武帝時父倫之以安北將軍鎮襄陽伯符爲竟陵太守時竟陵蠻屢爲寇伯符征討悉破之由是有將帥之稱仕終護軍將軍丹陽尹卒諡曰肅

申謨魏郡魏人也世祖時與朱脩之守滑臺爲魏所沒後還元嘉中爲竟陵太守

孟宗嗣平昌安丘人祖懷玉封陽豐縣男父慧熙嗣坐奪爵宗嗣爲竟陵太守

劉德願元嘉二十七年大舉北征詔以江夏王義恭爲眾軍節度寧遠將軍竟陵太守南城縣開國侯劉德願籍荆雍之勁攬郡師之銳直由武關稜威震滸

薛安都河東汾陰人初以功封南鄉縣男孝建元年討魯爽安都時爲左將軍遣守厯陽有功遷輔國將軍竟陵內史世祖使沈慶之督統諸軍慶之使安都追之及爽於小峴安都望見爽便躍馬大呼直往刺之應手而倒左右范雙斬爽首爽累世梟猛生習戰陳咸云萬人敵安都單騎直入斬之而反時人皆云關羽之斬顏良不是過也進爵爲侯後謀逆死

陳懷真泰始二年爲竟陵郡丞時晉安王子勛僭位張興世與劉胡戰於錢溪胡走入沔眾稍散比至石城裁餘數騎懷真在竟陵聞胡往過率數十人斷道邀之胡人馬旣疲自度不免因隨懷真入城告渴與之酒胡飲



畢引佩刀自刺不死斬首送京邑張興世弟僧產追胡未至石城數十里逢送胡首信將還竟陵殺懷真竊有其功郢州行事張沈偽竟陵太守丘景先聞敗變形逃走追擒伏誅

臧質字含文東莞莒人爲竟陵內史歷守三郡吏人便之後從劉義宣亂誅

周裴寬河東聞喜人保定元年出爲汾州刺史天和二年行復州事

齊劉懷珍字道玉平原人孝武中爲輔國將軍平胡中郎將徐州刺史後授寧朔將軍竟陵太守

曹景宗字子震新野人以膽勇聞頗愛史書每讀穰苴

樂毅傳輒放卷歎息曰大丈夫當如是梁武爲雍州刺史景宗深自納附數請帝臨其宅時天下方亂帝亦加厚意焉表爲竟陵太守及帝起兵景宗聚眾并率五服內子弟三百人從軍帝至竟陵以景宗爲右衛將軍梁天監二年封竟陵縣侯卒贈開府儀同三司謚曰壯史敘曰梁興景宗依日月末光賞茂通侯榮高列將配迹方召勒勛鐘鼎亦風雲之盛會也然景宗爲郢州警貨聚斂又躁動驕淫魏國司州竟不時救爲任昉所彈豈純臣哉

房僧寄永元二年竟陵太守僧寄將還建康至郢梁武勅僧寄留守魯山除驍騎將軍



梁康絢字長明藍田人天監元年竟陵太守魏國梁州刺史王珍國請救絢以郡兵赴之魏軍退

柳仲禮河東解人簡文帝時司州刺史湘東王繹與岳陽王詵爲敵詵求援於魏繹使仲禮鎮竟陵以圖詵及南陽圍急杜岸請救仲禮帥眾於安陸竟陵郡守孫暲以郡降於魏仲禮乃使司馬康昭如竟陵討暲暲降仲禮命其將王叔孫爲竟陵太守而以輕兵師於滌頭將侵襄陽詵告急於魏魏遣楊忠援之仲禮敗沒王叔孫因斬暲以竟陵降於魏

王僧辯字君才太原人太清中竟陵太守三年七月湘東王繹遣僧辯及信州刺史鮑泉擊湘州分給兵糧刻

日就道僧辯以竟陵部下未盡至欲俟眾集然後行與眾入白繹求申期繹疑僧辯觀望按劍厲聲曰卿憚行拒命欲同賊今日惟有死耳因斫僧辯中其左髀悶絕久之方蘇卽送獄泉震怖不敢言僧辯母徒行入謝自陳無訓繹意解賜以良藥故得不死尋出之因代鮑泉克湘州封長寧公卒平侯景之亂後陳霸先襲之被殺長子顓承聖初位侍中魏剋江陵隨王琳入齊爲竟陵郡守齊遣王琳鎮壽春將圖江左及陳平淮南殺琳顓聞之出郡城南登高冢上號哭一慟而絕李延壽曰僧辯風格秀舉有文武奇才而逢茲酷濫幾致隕覆幸全首領卒樹奇功事人之道於斯爲得



張惠紹字德繼義陽人也少有武幹齊明帝時爲直閣出補竟陵橫桑戍主尋爲竟陵太守

唐李齊物玄宗天寶五年爲河南尹坐李林甫言朋黨貶竟陵太守見陸羽於伶人中異之授以詩後生子名

復亦爲是郡太守

周愿詩八十年前棠樹陰竟陵太守公先人

陳璠復州長史初淮南將張瓌韓師德據復岳二州自署刺史時陳儒爲荆南節度瓌引兵入殺儒據荆南瓌滑州人勇暴而殘荆故將夷戮幾盡廣明三年宗權遣趙德諲連攻之城陷瓌死璠從瓌至江陵密斬其首置囊中獻京師授安州刺史

盧虔復州刺史

孟郊詩知音不韻俗獨立占古風忽挂觸邪冠遠逐南飛鴻肅肅太守章明明

沔陽州志卷十三

八

華載躬高山無平路楚水有驚濤

崔訐復州刺史

韓愈有序詳文集中

于延陵宣宗十二年授建州刺史以不職貶復州司馬董元素咸通中刺復州開五華山石堰渠

五代晉吳巒開運元年以復州防禦使權知貝州事

漢王彥超臨清人初爲復州防禦使時宋太祖往依之不納太祖登極建隆二年幸作坊宴射酒酣顧彥超曰卿曩在復州朕往依卿何不納我彥超降階頓首謝曰臣當時一刺史耳勺水豈能容神龍耶使臣容陛下安有今日上大笑而罷之

宋梁延嗣京兆長安人少事高季興頗見委任歷事四



帥人稱其忠蓋繼沖之納土也延嗣亦嘗勸之太祖嘉之開寶中授復州防禦使後因郊禮自復州入朝慰撫之曰使高氏不失富貴爾之力也改濠州防禦使

何文度紹興丁丑知復州得蘭亭石刻於民間國子祭酒南昌

胡儼記定武蘭亭石刻鑄損天流帶石四字然又有肥瘦二本而鑄損者乃為真定武後復州以此本重模亦鑄損四字其字極瘦王順伯尤延之爭辯如聚訟然瘦本風韻竟勝又云復州裂本首六行斜裂第一行闕會字又永字與二行會字三行畢字四行脩字五行為流二字六行弦字正當裂處十三行因字內改筆作小伸字十七行向之字差大二十五行視昔下二字作園字夫字上露初也字末行文字稍重乃景陵郡齋故物湮沒民間文度搜訪得之又云蘭亭諸本當以復州本為勝次豫章本次劉無言本次北京本其他皆不及

史敘曰吉水王佐云定武刻轉移至揚州而失宣德初何運使士英偶得之載歸金華獨復州者失所在爾夫

古人片藝之長莫不寶惜况右軍此帖號稱神助而定武復州之本又為逼真文度搜得之遂至流播其賢於士英遠矣後有復得者尚存之亦一方之嘉玩也

張堉元符中知復州張耒詩風流家世仁人後豈弟歌謠楚俗傳

李森宣和時御史丞時王黼秉政侍郎鄧之綱婢入黼第不出鄧聞於朝送臺考訊森以實聞且劾其罪異日

黜知復州

焦惟正紹興中知復州胡寅伏義廟記惟正秉心純撫民惠在郡三歲人和年豐

張適道知復州呂本中詩聞道復州賢太守只如前在武陵時相逢未說為州樂所至先傳喜

謝悰字公定元祐中景陵主簿黃庭堅詩謝公文章如虎豹至今斑斑在兒孫



竟陵主簿極多聞萬事不理專討論澗松無心古須鬢  
天球不琢中粹溫落筆塵沙百馬奔劇談風霆九河翻  
胸中恢疎無怨恩當官持廉且不煩吏民欺公亦可忍  
慎勿驚魚使水渾漢濱耆舊今誰在駟馬高蓋徒紛紛  
安知四海習鑿齒  
挂笏看度南山雲

元安伯寧至正間沔陽府尹

傅與礪詩  
見提封下

皇明許弼字廷輔黃巖人貢士洪武初沔陽府通判

宋

史瀛雲中辭序弼少以文名尤能挽強命中國初起應  
鄉闈遂中第二通判沔陽府其剽煩劇如庖丁解牛恢  
恢乎投刃而有餘地矣

史敘曰諸公之政僅見於名賢之所稱述其詳不可考  
矣錄之者備遺也

郝崧絳人貢士正德初知沔陽九月致仕去抵家其兄  
止崧於外取其牒視之知不以他歸始聽崧入其家規

如此

沔陽州志卷十三

十

張璉濟南人貢士弘治末沔陽判官狷介有守每出不  
受民一飯卽飯之必償其直而後食嘗行縣莫歸適城  
閉從者呼之璉曰此禁門也去宿敘從父家從父爲具  
食璉覺遽起改宿於鄰比曉而入

李楫字濟之懷寧人進士正德十年以御史出判沔陽  
尋遷太和知縣終貴州參議

任佃字象虞南充人進士嘉靖六年以御史出判沔陽  
未幾遷江陵知縣

袁時習字本初洪武十一年沔陽學正優於詞翰有清  
掬集百餘韻



辛榮鄱陽人永樂初沔陽訓導遷國子助教以學行轉提學僉事

徐曦字淑霽開化人弘熙時沔陽學正預修永樂大典選給事中以疾轉楚府伴讀

彭質字尙彬南昌人儒士正統十年沔陽訓導善大字林惟盛字培之新建人貢士景泰二年沔陽學正精地理易數嘗上疏請遷學不報遷鹽山知縣

張順字弘裕錢塘人舉浙江第一天順元年沔陽學正善詩文草書所著有井觀慈庵西湖醉樵諸集

胡經字循綸安福人貢士景泰元年沔陽訓導優於文學善啟迪嘗修郡志三卷遷虹縣知縣

陳明字文顯懷安人貢士弘治初沔陽學正有學行屢典文衡秩滿致仕歸所著有易安集

林允茂長樂人監生弘治中沔陽訓導甫至卽奔喪時遇節竟不少需而歸

喬著冠縣人正統初景陵主簿有修學功

李東字元震番禺人貢士正德中知景陵時澇後城隍多圯東俱修之又修廟學遷興國知州

史敘曰璉廉而無爲崧到官未久校官時習而下其文足稱其教則余生也後莫之能詳矣

贊曰彬彬諸子弭節漢涯政教雖泯聲迹或遺爰摭散

逸用備詢咨

沔陽州志卷十三

盧靖校刊